



Aqqalu C.Jerimiassen
Atassut

UPA 2023/67 - 1
11. maj 2023

Innuttaasut, suliaqartut/immikkut ilisimasallit, namminersorlutik inuussutissarsiortut, kommunit Inatsisartunilu partiit imigassamik akiuniarnermi ataatsimut periusissialiornermi akuliunneqarlutik, ukiunut arlalinnut atuuttussamik ilisimatuussutsikkut uppersarsakkanik toqqammaveqartumik imigassamut politikissamut toqqammavissamut suliakkiummik Naalakkersuisut peqquneqarnissaannik Inatsisartut aalajangiiffigisassaattut siunnersuut. Periusissiaq atuutilersitsinermi aningaasatigut allaffissornermilu kinguneqaatissanut naatsorsukkanik imaqassaaq, UPA2025-milu agguaanneqassalluni.

(Inatsisartunut ilaasortaq Agathe Fontain, Inuit Ataqtigiit)

Imigassaq pillugu ilaana periusissioqatigiissinnaavugut, taannalu tassaasinnaavoq imigassap paquminarsarneqartuarnerata, ajortorsuakkiariniarneqartuarnerata sunullu tamanut pisuutitassatut saqitinniarneqartarnerata allanngortinniarneqarnissaa.

Unalu eqqarsartaaseq; imigassarooq peqqutaalluni aningaasartuutit. Ila taanna imaattussaangunaruarpog; inuit perulluliorsimasut imigassartorsimasut. Imigassartorsimasummi nammineq imigassaq suungaluarnersoq pisiaraa namminerlu qanerminut isertillugu, akisussaaffik inummiittuaannarmat.

Assigiinnarunnarsivaami oqarutta, diabetesimik eqqungaasarneq annertunera ajornartorsiutaammat mamakujuit allallu sukkoqarluartut pillugit iliuuseqartariaqartugut, peqqinnissaqarfitsinnullu imannak akisutigimmat taamaaliortariaqartugut. Imaluunniit aallaasit inunnu ulorianartuummata pisiniarfimmiissanngitsut, uffa atuisup kisimi ulorianartunngortissinnaagaa kukkusumik atoruniuk.

Imigassaq toqqortinngikkaluarlugu, immikkullu inatsisiliunngikkaluarlugu, pinaversaartitsinikkulli malingassanik nuannaartunartunik pilersitsinissaq soqutiginaruusinnaavoq. Taamatullu saqqummiuttarnissaa, inuuneq imigassartunngikkaluarluni torrassuusoq.

Assersuutissatsialaasinnaavoq, arsaattartoq tusaamasarsuaq Cristiano Ronaldo VM2022-imi tusagassiortunik katersortitsinermi imeruusaatit aalakoornartortallit peqqinnanngitsullu illikarteriarlugit, imeq tigungamiuk oqartoq: “imertorluartarit”.

Tamannalu nunarsuaq tamakkerlugu annertuumik tusagassiuutitigut malunginiarneqarluaqaaq, tassa periuseq pitsassuaq. Inuppasuit qummut isigisaasa iliusaat kikkorpasuarunut annertuumik sunnuteqarsinnaasarmat. Naamingaa kiffaanngissusaajaavoq, qitiusumiillu aalingersaavoq, ila periutsip torraangaluassusaa pisariuallaanngikkaluassusaalu.

Toqqammaviatigut siunnersuut akuersaavinngikkaluarlugu itigartiinnarusunngilarput, allatummi killilersuineramik ilusilinnngikkaluarlugu aaqinneqarsinnaammat.

Atassummiit taamatut oqaaseqarluta, siunnersuut Peqqissutsimut ataatsimiitsitaliamut innersuupparput.